

Guangjisi Minzcu Bau

ganhhau: CN45-0036 B.2019 Nd.11 Ng.20 liggaeuq geijhah nienz ndwencib ngeihseiq

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3400 期

Gaiq Daihngaih Daengx Gih Siujhagseng Dangciengz Yunguh Sawcuengh Raiz Faenzcieng Doxdax Youq Nanzningz Banh

Bonjbauq siusik (gicej Cau Dwzfeih) Ndwen 11 ngoenz 16, Gaiq Daihngaih Daengx Gih Siujhagseng Yienhciegz Sawcuengh Cozvwz Doxdax youq Nanzningz banh, hozdung dwg Swcigih Gyauyuzdingh cawjbanh, Nanzningz Swhfan Dayoz ciepbanh. 80 boux siujhagseng 28 aen yienh(si, gih) daengx gih camgya baez doxdax neix.

Baez doxdax neix boux camgya doxdax cungj dwg doenggvaq aenban, hagdangz, yozbengih, yienh si gih baenz caengz baenz caengz senjleh, doeklaeng doigawj camgya daengx gih doxdax. Doxdax faen A、B song cuj, A cuj dwg sam、seiq nienzgaep, B cuj dwg haj, roek nienzgaep, hagseng ciuq gij daezmoeg dangciengz aeu hawj haenx raiz faenzcieng.

Doxdax yienhciegz, gyoengq boux camgya doxdax cingsaenz gvaekgvaek, saenqsim cibcuk, yunguh Sawcuengh raiz gij gojgaeq hawj vunz yinx, aeu gij raen gij naemj bonjfaenh raiz ok-daeuj, doenggvaq faenzcieng gangjok gij siengjap daegbied lai yienh bonjfaenh.

Youq mwh aen yizsi gietsat, Swcigih Gyauyuzdingh Minzcuz Gyauyucu fucucangj Lij Gvangihaij gangjvah. De naeuz, baez doxdax neix muzdiz dwg daezsang gij naengzlig gangj caeuq yunguh Sawcuengh Vahcuengh hagseng, gungganq gij yinxdaeuz hagseng hag Sawcuengh, fungfouq gij ndwenngoenz vwnzva ndawhag aen hagdangz Cuengh Gun song sawvah, gunghawj aen daiz-heiq ndeu hawj hagseng Bouxcuengh



▲Doxdax raiz faenzcieng yienhciegz.

langhbaij bonjfaenh. Doengzseiz, doeng-gvaq doxdax, dajcauh gij vunqsik moq sonhag gyauyenz Cuengh Gun song sawvah yunguh “beij” coi “maeq”, yunguh “maeq” coi “son”, “beij, maeq, son” dox giethab haenx, cau’ok gij heiq-faenh ndei sonhag gyauyenz Cuengh Gun song sawvah, coicaenh Cuengh Gun song sawvah sonhag laebdaeb haiguh.

Youq mwh aen yizsi gietsat, Gvangisih Minzcuz Bause cungibenheiz, hoizsaemj Yangz Lanzgvei daiqbiuj bingzvej guh diemjingz. Gyoengq bingzvej nyinhnaeuz, gyoengq boux camgya doxdax, saw raiz ndaej

deng, mbawgienj seuqcingh, faenzcieng dingzlai hagseng soq cihsaw cungj gaeuq lo, yawj ndaej ok aen hagdangz miz boux camgya doxdax haenx yawjnaek baez doxdax neix dangqmaz, gaenxmaenx cujiz hagseng camgya doxdax caemhcai youq mwh doxdax doekgonq son dem. Baez doxdax neix miz haujlai faenzcieng ndei, daj faenzcieng yawj rox gij giekdaej Sawcuengh hagseng ndei, raiz faenzcieng miz lohnaemj, aen cungsim faenzcieng yienhda, miz cingz miz noh, cungfaen langhbaij le gij cingzci ndei Cuengh Gun song sawvah sonhag.

“Ranzyauz Yeyau” Haeuj Mbanjyauz Vunzlai Yauzcuz Gyo Dangjaen

Ndwen 11 ngoenz 13 banhaemh, ndaej daengz Lingzyinz Yenveij Dungj-canbu sonyinx, ciengz “Ranzyauz Yeyau” minzcuz vunz daegbied noix Cauzlij Yauzcuz Yangh mbouj dox-doengz ndeu bae daengz Bingz dangz Cunh Mbanjgiubungz guh. 20:30 “Ranzyauz Yeyau” cingqsik hainduj gangj, vunzmbanj saimbwk lauxnyez doxcomz youq giz ndeu, ganbu capyouq mbanj caeuq ganbu cunh “song vej” aeu gij caizliuh yaek gangj haenx dawz okdaeuj, gangj gij gangjvah youqgaenj Siz Ginbingz cungjsuhgi caeuq gij cingsaenz Cibgouj Daih Dangj, gij saehsaed senhconz Vangz Vwnzsiu, vut gungz gunggeng, lajmbanj saenqhwnz daengj cwngcwz hawj vunzmbanj. Boux-senhconz yaep ndeu gangj Vahbuj-

dungh, yaep ndeu gangj Vahcuengh, yaep ndeu gangj Vahyauz, vunzmbanj dingq ndaej yinx dangqmaz.

“Yunguh Vahbujdungh gangj cwng-cwz gonq, yienzhaeuh yunguh Vahcuengh roxnaeuz Vahyauz gangjgej cwngcwz hawj vunzmbanj, yienhneix hawj vunzmbanj rox ngaih lai.” Yangh dang-vej suhgi Mungz Gangh gaisau naeuz, daengx yangh 20 lai aen Mbanjyauz minzcuz vunz daegbied noix, bouxgangj yangh, cunh song gaep binaengz cungj aeu daengz mbanj gangj baez ndeu song baez doxhwnj. Lingzyinz Yen minzcuz daegbied noix “Ranzyauz Yeyau” bi 2017 cingqsik hainduj, seizneix boux-gangj mboujdan yunguh Vahbujdungh Vahgun gangj cwngcwz ndaej, youh yunguh Vahcuengh gangjgej cwngcwz

ndaej haenx, moix aen yanghcin cungj miz.

Linghvaih, aenci riuzdoengh daeuj gangj hix dwg gij daegsaek Lingzyinz Yen senhconz hagsib gij gangjvah youqgaenj Siz Ginbingz cungjsuhgi caeuq gij cingsaenz Cibgouj Daih Dangj, gij saehsaed senhconz Vangz Vwnzsiu, vut gungz gunggeng, lajmbanj saenqhwnz daengj cwngcwz, aen yienh neix lij cienmonz boiq ci, gwnz ci bwh miz gij caizliuh senhconz yunguh Vahgun, Vahcuengh, Vahyauz loegyaem ndei haenx, guekgya banggungz cwngcwz, yivu gyauyuz cwngcwz, yihliuz veiswng h cwngcwz daengj cungj miz, aeu cwngcwz cienz daengz gak vunz gak mbanj bae.

(Vangz Yenzjungz/黄元荣)

SIUSIK DINJ

● Mboengqneix, Sw-cigih Segohlenz, Denzyangz Yen Gungh’ anhgiz laebdin vih lwgminz guh saehsaed, bae daengz Denzyangz Yen Nazboh Cin Lungcuuh Cunh guh hozdung “vut gungz gunggeng soengq vafeiz”, yunguh saedsaeh hengz-doengh hengzguh aensim goeknduj rap sawjmingh. Ciuq cam rox, hozdung ngoenzhaenx gunguh soengq vafeiz, ywgajnon daengj doxgaiq 8.5 dun dij 6.5 fanh maenz bae hawj 36 ranz ranzungzhoj aen cunh neix.

(Cauh Yang)

● Ndwen 11 ngoenz 12, aen hoilh son’gyauq gejnaeuz gyaek guek cuji gyauyuz youz Nanzdanh Yenveij Senhconzbu, Yen Gyauyuzgiz daengj bouh-monz lienzhab banh haenx youq Vujai Cin Nazdi Siuj-yoz banh. Hozdung doeng-gvaq gangj gij gojgaeq saekhoengz, ciengq go gwz-ming, caenh’itbough fung-fouq gij ndwenngoenz vwnz-va ndawhag, gikfat gij cingz gyaek guek cuji gyoengq hagseng, cau’ok gij heiq-faenh vwnzva saekhoengz ndei.

(Mauz Hijcing)

● Geij bi neix daeuj, Baksak Si Yougyangh Gih Swdangz Cin Semaj Cunh yunguh lai diuz roenloh, ciuq ranz yunguh banhfap, coi-caenh ranzungzhoj laisou. giengzvaq canjnieb bouj-ciengj, gujli hwngfat daj-ciengx, yunguh ciengj, gujli ranzungzhoj dajndaem makgaivaiz, oij, haeuxnaz caeuq dajciengx mou, gaeq, bit, bya daengj, bauj-maenh miz souhaeuj onj-dingh.

(Veiz Ginjgvangj)

● Geij bi neix daeuj, Vanzgyangh Mauznanzcuz Swciyen haenqrengz hwngfat dajndaem makbug ndaw nding, daengx yienh makbug ndaw nding dajndaem najdieg daengz 6.8 fanh moux, nangqdaengz ranzungzhoj 5520 ranz 19980 vunz, baenz gij cujdaui canjnieb, lajmbanj ginghci canjnieb youqgaenj vut gungz gunggeng aen yienh neix.

(Veiz Yui)